

समे – 12:25 hrs.

<><><><><><>

एह आकाशवाणी जम्मू ऐ, हुन तुस जगमोहन शर्मा कोला खबरां सुनो।

Prez. SC

राष्ट्रपति द्रौपदी मुर्मू होंरें राज्य विधेयकें पर फैसले लैने लेई राज्यपाल ते राष्ट्रपति लेई समें सीमा तैहत करने आहले सुप्रीम कोर्ट दे 8 अप्रैल आहले फैसले पर प्रतिक्रिया दिंदे होई अदालतें गी पुच्छेआ ऐ कि जिसले संविधान च ऐसी कोई बवस्था ऐ गै नेई तां ओह इस चाल्ती दा फैसला कियां देई सकदा ऐ। राष्ट्रपति होंरें इस फैसले गी संविधान दिएं हदें अंदर दाखल करार दिंदे होई संविधान दी दफा 143 (1) तैहत सुप्रीम कोर्ट कोला 14 संवैधानिक सोआलें पर ओहदी राय मंगी ऐ। इस्से बरे अप्रैल महीने सुप्रीम कोर्ट नै राज्यपाल आसेआ भेजे गेदे विधेयकें पर फैसला लैने गितै राष्ट्रपति लेई 3 महीने दी समें-सीमा तय कीती ही। सुप्रीम कोर्ट नै फैसला सनाया हा जे राष्ट्रपति गी राज्यें दे गवर्नरें आसेआ राष्ट्रपति दी मंजूरी लेई सुरक्षित रक्खे गेदे राज्य विधेयकें पर 3 महीने दे अंदर-अंदर फैसला देना होग।

<><><><><><>

Rajnath-Singh

रक्षा मंत्री राजनाथ सिंह होर जम्मू-कश्मीर दौरे पर श्रीनगर पुज्जी गेन। उंदा अज्ज इक सुरक्षा समीक्षा बैठक लोआइयै समूलचे केंद्र शासित प्रदेश दे मजूदा सुरक्षा हालात दा जायजा लैने दा कार्यक्रम ऐ।

<><><><><><>

CM-Army Commander

उत्तरी कमान प्रमुख लेफ्टिनेंट जनरल प्रतीक शर्मा होंरें मुख्यमंत्री उमर अब्दुल्ला हुंदे कन्नै मलाटी कीती ते उनेंगी मौजूदा सुरक्षा स्थिति बारे अवगत करोआया। उनें जम्मू-कश्मीर दे अंतरराष्ट्री बन्ने ते कब्जा रेखा कन्नै लगदे इलाकें च होई दी हाल दी गतिविधिएं बारे बी जानकारी उपलब्ध करोआई। इस मौके पर 15 कोर दे जीओसी लेफ्टिनेंट जनरल प्रशांत श्रीवास्तव होर बी उन्दे कन्नै मौजूद हे। मुख्यमंत्री उमर अब्दुल्ला होंरें आखेआ जे साहडे सुरक्षाबल बेहतर तरीके कन्नै मुख्यै दी राखी हिफाजत करा'रदे न।

<><><><><><>

Tiranga-Yatra

भारतीय फौज दे आप्रेशन सिंदूर दी ऐतिहासिक जित नै समूलचे मुल्खै गी आत्म सम्मान ते गौ दी भावना कन्नै भरी दिते दा ऐ ते हर कोई अपने सैनिकें दी हिम्मत, दलेरी ते राष्ट्र दी रक्षा लेई उंदी समर्पण भावना दा गुणागान करा करदा ऐ। इस्सै कामयाबी गी इक जश्न दे रूपै च मनाने लेई मुख्य भरै च 11एं दिनें दिएं तिरंगा जातराएं दा सरिस्ता कीता गेआ ऐ जेदे च शामिल समाज दे बक्ख-बक्ख तबकें दे लोक भारत माता दी जय ते भारतीय थेआरबंद बलें दी जय-जयकार करदे होई चबखिया देश प्यार ते राष्ट्रीय इकजुटता दा नजारा पेश करा करदे न। आकाशवाणी दे जम्मू संवाददाता नै जानकारी दिती ऐ जे जम्मू च तिरंगा जातरा अज्ज कड़्डी जा'रदी ऐ। जम्मू-कश्मीर बीजेपी दे संगठन महासचिव अशोक कौल होरें जम्मू दे लोकें अगगे अपील कीती ऐ जे ओह इस जातरा च शरीक होने लेई अज्ज संझा 5 बजे जम्मू दे इंदिरा चौक च कट्ठे होन। एह जातरा इंदिरा चौक थमां लेइयै विक्रम चौक तोहड़ी कड़्डी जाग जेदे च समाज दे बक्ख-बक्ख वर्गें दे लोकें दे बधी चढ़ियै हिस्सा लैने दी मेद ऐ।

<><><><><><>

DGP

पुलस महानिदेशक नलिन प्रभात ते जम्मू दे आई.जी.पी होरें जंदे राज पुंछ दा दौरा लाया ते उत्थे हालात दी समीक्षा कीती। जिला पुलस लाइन्ज च उनें बन्ने पारा गोलीबारी करी होए दे नुकसान दा तफसीली जायजा लैता ते मकामी पुलस कर्मिण कन्नै गल्लबात बी कीती। दौरें दौरान उनें राजा सुखदेव सिंह जिला अस्पताल दा बी दौरा कीता ते उत्थे दाखल घायलें दी डौल बी पुच्छी।

<><><><><><>

Search-Operation

जंदी रातीं किश मकामी लोकें आसेआ रियासी दे जंगलें कश संदिग्ध नक्लो हरकत दिक्खे जाने दी सूह थहोने दे बाद सुरक्षाबलें इक तुपाई अभियान शुरू कीते दा ऐ। इस सिलसिले च पूरे इलाके गी खंगालेआ जा करदा ऐ तां जे इलाके दी सुरक्षा गी यकीनी बनाया जा।

CCPA-Amazon

केंद्री उपभोक्ता प्राधिकरण नै पाकिस्तानी झंडे ते एहदे कन्नै जुड़े दे माल-समेयान दी बिक्री बारे अमेजान इंडिया, फ्लिपकार्ट, Ubbly India, ESTy फ्लैग कंपनिएं ते फ्लैग कार्पोरेशनें गी नोटिस जारी कीता ऐ। सोशल मीडिया पोस्ट च केंद्री उपभोक्ता मामले दे मंत्री प्रहलाद जोशी होरें ई-कामर्स प्लेटफार्मे गी हुक्म दिता गेआ ऐ जे ओह इस चाल्ली दी सारी सामग्री गी फौरन हटान ते राश्ट्री कन्नूनें दा पालन करन।

NCSC-Training

अनुसूचित जातिएं ते जनजातिएं लेई राश्ट्रीय करिअर सेवा केंद्र जम्मू जेड़ा जे भारत सरकार दे श्रम ते रोजगार मंत्रालय दे रोजगार सरबन्धी महानिदेशक दे मतैहत इक दफ्तर ऐ, ओह जम्मू-कश्मीर ते लद्दाख च अनुसूचित जातिएं ते अनुसूचित जनजातिएं दे बच्चें गी मुफ्त सिखलाई देने जा'रदा ऐ जिस दौरान उनेंगी स्टाइपेंड बी दिता जाग। एह सिखलाई उनें नौजवानें गी दिती जाग जेड़े अपने अंदर कोई हुनर पैदा करियै कम्म-रोजगार हासल करने दे लायक बनना चाहंदे न। योग्य नौजवानें गी "नीलिट" ते विशेष कोचिंग स्कीम तैहत इक बरे लेई ओ लेवल कम्प्यूटर साफ्टवेयर ते ओ लैवल कम्प्यूटर हार्डवेयर ते मेनटेनेंस दा सिखलाई कोर्स कराया जाग। सिखलाई हासल करने दी इच्छेआ रखने आहले नौजवान जम्मू दे तोप शेरखानियां, शांति नगर स्थित रोजगार निदेशालय दी ईमारत दी चौथी मंजल च एससी, एस.टी लेई राश्ट्रीय करिअर सेवा केंद्र च कम्मकाज आहले कुसै बी ध्याड़े जाइयै संपर्क करी सकदे न।

Read by: Jagmohan Sharma

Composed : Varinder Sharma

Editor: Kunal Shrivatsa